

ՄԻՋԵԿԵՂԵՑԱԿԱՆ



ՎԱՏԻԿԱՆՈՒՄ ՄԿՄՎԵՑ ՀՌՈՄԵԱԿԱՆ ԿԱԹՈԼԻԿ ԵԿԵՂԵՑՈՒ ԵՊԻՍԿՈՊՈՍԱՑ ԺՈՂՈՎԻ 12-ՐԴ ԳԱԳԱԹՆԱԺՈՂՈՎԸ

Հոկտեմբերի 5-25-ը Հռոմեական Կաթոլիկ Եկեղեցու պետ Նորին Սրբություն Բենեդիկտոս ԺԶ Պապի օրհնությամբ տեղի ունեցավ Կաթոլիկ Եկեղեցու եպիսկոպոսաց ժողովի 12-րդ գագաթնաժողովը, որին մասնակցում են ավելի քան 253 կաթոլիկ եպիսկոպոսներ աշխարհի տարբեր երկրներից: Գագաթնաժողովի մասնակիցները քննարկեցին Եկեղեցու առաքելությանն առնչվող թեմաներ «Աստծո Խոսքը Եկեղեցու կյանքում և առաքելության մեջ» խորագրի ներքո:

Հավաքին հրավիրված են ներկայացուցիչներ Ուղղափառ, Անգլիկան, Բողոքական Եկեղեցիներից և Էկումենիկ միջազգային կազմակերպություններից:

Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսի օրհնությամբ ժողովին մասնակցում է Դամասկոսի հայոց թեմի առաջնորդ Տ. Արմաշ եպիսկոպոս Նալբանդյանը:

ԵԿԵՂԵՑԻՆԵՐԻ ՀԱՄԱՇԽԱՐՀԱՅԻՆ ԽՈՐՀՐԴԻ «ՀԱՎԱՏՔ ԵՎ ԿԱՐԳ» ՀԱՆՁՆԱԽՄԲԻ ՀԵՐԹԱԿԱՆ ՆԻՍՏԸ ՀՌԻՆԱՍՏԱՆՈՒՄ

Հոկտեմբերի 8-14-ը Հունաստանի Կրետե կղզում տեղի ունեցավ Եկեղեցիների Համաշխարհային Խորհրդի «Հավատք և կարգ» հանձնախմբի հերթական նիստը, որի ընթացքում զեկույցներ լսվեցին «Ավանդություն և ավանդություններ», «Բարոյական չափորոշիչները և Եկեղեցին», «Էկումենիկ հիշողություններ» աստվածաբանական թեմաների շուրջ:

Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսի օրհնությամբ Մայր Աթոռ Սուրբ Էջմիածնից ժողովին մասնակցում է «Հավատք և կարգ» հանձնախմբի անդամ, Անգլիայի հայոց թեմի առաջնորդ Տ. Նաթան եպիսկոպոս Հովհաննիսյանը: «Հավատք և կարգ» հանձնախմբի երիտասարդ անդամներից է նաև Մայր Աթոռի միաբան Տ. Շահե աբեղա Անանյանը: